

UNDANG – UNDANG KECIL

CETAKAN SEMULA

**UNDANG-UNDANG KECIL TANDAS AWAM
(MAJLIS BANDARAYA SUBANG JAYA) 2005**

Mengandungi segala pindaan hingga 10 Disember 2020.

DITERBITKAN OLEH
JABATAN UNDANG-UNDANG
MAJLIS BANDARAYA SUBANG JAYA
2021

AKTA KERAJAAN TEMPATAN 1976
UNDANG-UNDANG KECIL TANDAS AWAM
(MAJLIS BANDARAYA SUBANG JAYA) 2005

SUSUNAN UNDANG-UNDANG KECIL

BAHAGIAN I

PERMULAAN

1. Tajuk ringkas dan permulaan kuat kuasa
2. Pemakaian
3. Tafsiran

BAHAGIAN II

PENGGUNAAN TANDAS AWAM

4. Kebersihan dan kehendak-kehendak lain
5. Syarat-syarat penggunaan tandas awam
6. Kewajipan penerima pajak
7. Tandas berasingan untuk berlainan jantina
8. Caj

BAHAGIAN III

PENGUATKUASAAN

9. Kuasa untuk mengarahkan orang keluar
10. Kuasa penangkapan
11. Kuasa menyita

BAHAGIAN IV

AM

12. Penalti am
13. Pendakwaan
14. Pengkompaunan kesalahan
15. Kuasa pegawai polis di bawah Undang-Undang Kecil ini
16. Pembatalan dan peruntukan peralihan

AKTA KERAJAAN TEMPATAN 1976
UNDANG-UNDANG KECIL TANDAS AWAM
(MAJLIS BANDARAYA SUBANG JAYA) 2005

PADA menjalankan kuasa yang diberikan oleh seksyen 73 Akta Kerajaan Tempatan 1976 [Akta 171]. Majlis Bandaraya Subang Jaya membuat dan menurut seksyen 103 Akta tersebut, Pihak Berkuasa Negeri mengesahkan, undang-undang kecil yang berikut:

BAHAGIAN I

PERMULAAN

Tajuk ringkas dan permulaan kuat kuasa

1. (1) Undang-Undang Kecil ini bolehlah **dinamakan Undang-Undang Kecil Tandas Awam (Majlis Bandaraya Subang Jaya) 2005**.

(2) Undang-Undang Kecil ini hendaklah mula berkuat kuasa pada 1 Januari 2006.

Pemakaian

2. Undang-Undang Kecil ini hendaklah terpakai hanya bagi kawasan Majlis Bandaraya Subang Jaya.

Tafsiran

3. Dalam Undang-Undang Kecil ini melainkan jika konteksnya menghendaki makna yang lain –

“Majlis” ertinya Majlis Bandaraya Subang Jaya;

“tandas awam” termasuklah mana-mana bangunan, bilik atau petak yang dibina dan diselenggara oleh Majlis, yang dibina oleh Majlis dan diselenggara oleh mana-mana orang atau syarikat yang dilantik oleh Majlis, di mana orang ramai boleh membuang air besar, membuang air kecil atau untuk mencuci dirinya;

“Datuk Bandar” ertinya orang yang pada masa itu menjalankan kewajipan-kewajipan jawatan Datuk Bandar Majlis Bandaraya Subang Jaya.

BAHAGIAN II

PENGGUNAAN TANDAS AWAM

Kebersihan dan kehendak-kehendak lain

4. Tiada seorang pun boleh –
- (a) Membuang sampah, meludah, membuang air kecil atau air besar di atas lantai kecuali dalam bekas yang disediakan bagi maksud masing-masing;
 - (b) Membiarkan paip air terbuka selepas menggunakannya sama ada atau tidak bekalan air sedang mengalir;
 - (c) Merosakkan atau memindahkan apa-apa barang dalam tandas;
 - (d) Mengotorkan, melukis, menconteng atau mengecat apa-apa di atas dinding atau siling;
 - (e) Berperangai tidak senonoh atau tidak sopan; atau
 - (f) Meninggalkan mangkuk tandas tanpa menyimbahkan air.

Syarat-syarat penggunaan tandas awam

5. Tiada seorang pun boleh –
- (a) Membasuh apa-apa pakaian atau meninggalkan pakaian itu untuk dikeringkan dalam tandas awam;
 - (b) Menyalakan api atau memasak makanan dalam tandas awam dan tiada seseorang pun boleh makan atau tidur di dalamnya;
 - (c) Mencuci makanan, perkakas, pinggan mangkuk atau apa-apa bekas dalam tandas awam;
 - (d) Menggunakan mana-mana tandas awam sebagai tempat untuk menyimpan barang-barang;
 - (e) Menjalankan transaksi perniagaan dalam mana-mana tandas awam; atau
 - (f) Dibenarkan mandi di dalam mana-mana tandas awam melainkan kemudahan mandi disediakan di dalamnya.

Kewajipan penerima pajak

6. Jika Majlis sudah memajakkan mana-mana tandas awam kepada mana-mana orang atau sudah membuat apa-apa perkiraan lain dengan mana-mana orang bagi pengurusan mana-mana tandas awam, orang itu hendaklah –

- (a) menjaga tandas awam itu supaya bersih dan memastikan pencahayaan yang mencukupi sehingga Majlis berpuas hati; dan
- (b) menyebabkan suatu salinan Undang-Undang Kecil yang ditulis dalam bahasa kebangsaan dipamerkan secara berterusan di tempat yang mudah dilihat di tandas awam itu.

Tandas berasingan untuk berlainan jantina

7. Jika Majlis sudah menyediakan tandas awam yang berasingan yang ditunjukkan dengan tandas yang sesuai untuk jantina yang berlainan, tiada seorang pun daripada sesuatu jantina tertentu boleh memasuki atau menggunakan tandas awam yang disediakan untuk jantina yang berlainan.

Caj

8. Jika Majlis sudah, melalui pemberitahu dalam Warta mengenakan caj bagi penggunaan mana-mana tandas awam tiap-tiap orang yang menggunakan tandas awam itu hendaklah membayar dalam caj yang ditetapkan bagi menggunakan itu.

BAHAGIAN III**PENGUATKUASAAN****Kuasa untuk mengarahkan orang keluar**

9. Mana-mana orang yang melakukan apa-apa perbuatan yang melanggar Undang-Undang Kecil ini boleh diperintahkan oleh Datuk Bandar atau mana-mana pegawai yang diberi kuasa supaya meninggalkan tandas awam itu.

Kuasa penangkapan

10. (1) Datuk Bandar atau mana-mana pegawai diberi kuasa boleh menangkap tanpa waran mana-mana orang-

- (a) yang semunasabahnya dipercayai olehnya telah melakukan suatu kesalahan di bawah Undang-Undang Kecil ini; atau
- (b) yang enggan memberikan nama dan alamatnya apabila diminta atau jika ada sebab untuk meragui ketepatan nama dan alamat yang diberikan.

(2) Seseorang yang ditangkap di bawah Undang-Undang Kecil ini hendaklah dibawa ke balai polis dan hendaklah dibawa ke hadapan seorang Majistret dalam masa dua puluh empat jam, melainkan jika sebelum dari masa itu nama dan kediamannya yang sebenarnya telah dapat ditentukan, dan dalam hal yang sedemikian orang itu hendaklah dilepaskan dengan serta-merta apabila dia menyempurnakan suatu bon untuk hadir di hadapan seorang Majistret jika dikehendaki sedemikian.

(3) Apabila mana-mana orang sedemikian dibawa ke hadapan seorang Majistret, Majistret itu boleh sama ada menghendaki dia menyempurnakan suatu bon, dengan atau tanpa penjamin untuk hadir di hadapan seorang Majistret sekiranya dikehendaki, atau boleh memerintahkan supaya ditahan dalam jagaan sehingga dia dapat dibicarakan.

Kuasa menyita

11. (1) Mana-mana pegawai diberi kuasa boleh menyita atau mengalihkan apa-apa barang atau benda yang menyalahi Undang-Undang Kecil ini dengan risiko ditanggung oleh pemunya.

(2) Apa-apa benda atau barang yang disita di bawah perenggan (1) ini adalah daripada jenis yang mudah rosak atau yang mengikut sifatnya lekas rosak atau jika penjagaan benda atau barang itu melibatkan perbelanjaan dan kesusahan yang tidak munasabah atau dipercayai akan membahayakan orang ramai, pegawai diberi kuasa oleh mengarahkan supaya benda atau barang itu dilupuskan mengikut acara yang ditentukan oleh Majlis.

(3) Mana-mana orang yang menuntut apa-apa benda atau barang selain benda atau barang yang disita di bawah perenggan (2), boleh menuntut benda atau barang tersebut daripada Majlis dalam tempoh minima tujuh hari bekerja atau maksima satu bulan dari tarikh benda atau barang itu disita tertakluk kepada apa-apa syarat dan pembayaran yang dikenakan oleh Majlis.

(4) Datuk Bandar atau mana-mana pegawai diberi kuasa tidaklah bertanggung kepada mana-mana orang bagi apa-apa kemerosotan, walau apa pun sebabnya, dalam kualiti apa-apa benda atau barang yang disita di bawah Undang-Undang Kecil ini.

BAHAGIAN IV

AM

Penalti am

12. Seseorang yang melakukan suatu kesalahan di bawah Undang-Undang Kecil ini yang baginya tiada penalti diperuntukkan dengan nyata boleh apabila disabitkan, didenda tidak melebihi dua ribu ringgit atau di penjara selama tempoh tidak melebihi satu tahun atau kedua-duanya, dan dalam hal sesuatu kesalahan yang berterusan boleh sebagai tambahan didenda tidak melebihi dua ratus ringgit bagi setiap hari kesalahan itu terurs dilakukan.

Pendakwaan

13. Tiada pendakwaan boleh dimulakan terhadap kesalahan di bawah Undang-Undang Kecil ini kecuali oleh atau dengan keizinan Pendakwa Raya.

Pengkompaunan kesalahan

14. (1) Datuk Bandar, Setiausaha atau Pegawai Undang-Undang Majlis boleh dengan keizinan Pendakwa Raya mengkompaunkan mana-mana kesalahan yang dilakukan di bawah Undang-Undang Kecil ini dan ditetapkan sebagai kesalahan yang boleh dikompaunkan dengan membuat suatu tawaran bertulis kepada orang yang disyaki telah melakukan kesalahan itu untuk mengkompaunkan kesalahan itu apabila dibayar kepada Majlis sejumlah wang yang tidak melebihi satu ribu ringgit bagi kesalahan itu dalam tempoh yang dinyatakan dalam tawaran itu.

(2) Sesuatu tawaran di bawah perenggan (1) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan baginya dimulakan, dan jika jumlah yang dinyatakan dalam tawaran itu tidak dibayar dalam tempoh yang dinyatakan dalam tawaran itu atau dalam apa-apa tempoh lanjutan sebagaimana yang dibenarkan oleh Datuk Bandar atau Setiausaha atau Pegawai Undang-Undang Majlis, pendakwaan terhadap kesalahan itu boleh dimulakan pada bila-bila masa selepas itu terhadap orang yang kepadanya tawaran itu telah dibuat.

(3) Jika suatu kesalahan telah dikompaunkan di bawah perenggan (1), tiada pendakwaan boleh dimulakan selepas itu berkenaan dengan kesalahn itu terhadap orang yang kepadanya tawaran untuk mengkompaun telah dibuat dan apa-apa benda yangg disita berkaitan dengan kesalahan itu hendaklah dilepaskan, tertakluk kepada apa-apa terma dan syarat yang ditetapkan.

(4) Kesemua wang diterima di bawah Undang-Undang Kecil ini hendaklah dibayar kepada kumpulan wang yang diwujudkan di bawah mana-mana undang-undang yang berhubung dengan kerajaan tempatan.

Kuasa pegawai polis di bawah Undang-Undang Kecil ini

15. Tiada apa-apa jua yang terkandung dalam Undang-Undang Kecil ini boleh mengurangkan kuasa seseorang pegawai polis untuk menyiasat apa-apa kesalahan di bawah Undang-Undang Kecil ini.

Pembatalan dan peruntukan peralihan

16. (1) Undang-Undang Kecil Tandas Awam (Majlis Perbandaran Subang Jaya) 1999 [Sel. P. U.50] adalah dibatalkan.

(2) Apa-apa notis, perintah, kompaun, lesen atau dokumen yang dibuat atau dikeluarkan di bawah Undang-Undang Kecil yang dibatalkan hendaklah, disifatkan telah dibuat atau

ENAKMEN 19

dikeluarkan di bawah Undang-Undang Kecil ini, dan hendaklah terus berkuat kuasa sehingga dibatalkan.

Dibuat oleh Majlis Perbandaran Subang Jaya dalam mesyuaratnya pada 30 Ogos 2005.
[PU. Sel. Am 0283]

DATO' MOHD ARIF BIN AB. RAHMAN
Yang Dipertua
Majlis Perbandaran Subang Jaya